



CRISTINA BAUTISTA: AHÇEÇX TXIJJX EXI'ZNXIS I'KHNA

Wala weçxathaw, Bautista Taquinas Txí' u'ywe'sx pkheekheçx nasa yaatxnxis umn.

Fxi'jnas: Vilma Rocío Almendra Quiguanás, Çxhab üus dxi'jan (pueblos en camino)

Luuçxwe'sxjíi' fxi'jnxi thegnas: Violeta Kiwe Rozental Almendra

Valle Kaapiya'jwa yat Cristina üuskwe yaatxnxi kpedu'jçx eçte txi'phna

Kpeedu'jnxi peena thegnas: Vilma Rocío Almendra Quiguanás

Eç wala pheewu'jnas: Derly Constanza Cuetia Dagua, Çxhab üus dxi'jan (pueblos en camino)

Kwe'sx yuwe fxi'jnas: Ladu Ä'skwe T. Tuunxivxu Kwe'sx Yuwe atpu'çxnas



Tejiendo Autonomías entre Pueblos y Procesos



Violeta kiwe y Vilma Rocío



Kwetyu' kiwete nasatx yaatxnxi buçxankähkukyu' CRIC jithaw taba a'kafx kajän wahça. Naa kiwete nasawe'sxtx ew yahtxçx fxiznxis çxhäçxha atxa'jnxi üsa naa Kulubya jithaw. Äçx sena petxun üsta, jxu'th ewsame pa'ka (kseba a'kafx nxa wahça,) Naa kiwe uta kwe'sx kiwete pa'jçx kutxi'jwëñ yuhta, wët wët fxi'znxite makyu' puuyi een makyu' napa kwe'sx fxi'nxis kapsu wëje'tx.





Cristina Bautista Taquinas kseba e'zte
çxaapuç a'tete pkhab khekan tawba
kheb akafxteneb buçxankähnikçe, Ul
kiwete, Kwetyu' kiwe, Tuunxivxu kawka
kiwete, Cristina, Dioselina Taquinas txi'
Uriel Bautista nyafx nxiisa' nekyu' aça
masula yattenik buçxankähnikçe, txijx
nwe'sx nxu' yuus we'wsata.







Txhüüçxä' dxiiya Eduar txi'
mpe'sxtxa's Deyanira, Viviana
txi' Amalfi buçxankäknitxçe.
nwe'sxn xu makwe thëysu
skhëwnike napa luuçxteyya
wëtnik ya' fxi'znikçe vxite
luuçxwe'sxna'w.





Luuçxtey, dxiiya iphçx txi
mpe'sxa kusete uweçx yatna
pe'jn u'jwenekyuçe.







Melx athwa' ji'phmenikyu' napa, piiya
sena wëdxikuk. Aça 4to fxidxte piiyn
u'jnikçe aça waas mutxi ësekwenik
pejxçe, yatte ji'phmeçx kaapiya'jnxi
yatuh kasëhnikçe. Luuçxteyya
nyakwe'sxa mhiinxha kaapevxa'jnikce,
txäanxu' kutxkwe txi' smiita
txwayunikçe.





Kseba a'kafzte ji'phçx Corinto
sxhabsu mhiinxha u'jçhe',
Teeçx a'kafzte kähçx melx
kaçya piiynikçe. Aça jxi'ji' txi'
mpe'sxji' melx kaçnikçe.





Napa txijx üuste çaa melx kaçwa'
walanas way wëjenikyu'çe, txaja
kseba a'akafx ji'pçx Kalxi sxhab
walasu mhiinxha u'jnikçe, kalxi
mhiinüste naamuthë ütxwënikyu'çe.
Aca teeçx jüinas pa'ka iyunikçe açyu
vxite yattenik mhiinxha u'j.







Thë'jwe'sx ipe'jn mhiikuk, vxitesa nxiis
na'wnik wëdxinik, vxite ahçeçx çxäänik
we'w, teeçx pizx pkhaakhçx uma's çaa
kaçwa mwayçx jïnk kaayatxi'jnikçe,
napa txää vxu nwe'sxna kahnikçe
teeçx klaakwe waywa', sxwedmenikyu'
nwe'sx puçxwa' wejxçxäänik mhiinx
takh kalxi sxhabte.





Teeçx u'ythë' yatte pa'jçx
piiyanik kahçe. Aça 5to fxidx
piiyywa' knaynikçe. Santa
Librada piiya yat jxa'nikçe,
txää eente jxi' txi' ney
pi'txnikçe aça na'jinikçe u'ka
peena piiywëjeth.





Txi' piiya ukanikçe txäwëyçxää
kalxi shabte sudyu' txwayn
mhikuk, sudyu' txwayn ewnik u'j
aça txää txwaynxi yat waynikçe.
Nasakwe sena wayunikçe aça
mpe'sxa jxunu'jnikçe jxtée kwetuhb
nxüsxa txwaywa'.







Teeçx ahçenas ewmenik we'w,
aça üpa çaan tu'snas pa'yanik.
Txäawe'snxu' kwetuhb txwaywa'
yat jxuka txhibnikçe. Naanxu' sena
nxus nxus nenhunikçe aça txää pa'ka
piiynxi wejxa peçxkananik üsu'.





Neynxu na'jnik, piiynxi yatuj
mkasëhwe txhina yatna sxwedwe.

Txäanxu' sxwedmenikçe, vxite
mhi'nik uyçe, napa thaakh wëjen
u'jute dxikhaasa's pubnusukuk txi'
üuskwe vxitnusukuk. Jxi'nzu txisu
tu'sçx pa'jxa ujwekuk pu'çxwën.







Nmehtenxu piiynxi yatte ewnik u'j,
aça nasakwe pu'çxwa' piiynikçe
txäwëy u'ywe'sx petxyuwa'jme
pu'çxwa' piiynikçe. Çxhäçxha nxa
üusçx nasakwe pu'çxwa' piiyn kähçe
txää piiynxi walate. Txäwëyçxää
eckwe knaynikçe ik kute'j DH piiyywa'.





Txijx nxa üusnxinxu' u'ywe'sxnixak
mhiiwä'kyu' txi' nasawe'sx fxi'znxis
nwe'wya. Pitxi pakweya txi' luuçxkwe
jiphuya yatxiçmekuk, yatteçxää u'pxapa
walukuk. Txijx nxa üusnxinxu mteepa
peku'jn u'juya süwëkyu'nikçe. Teedxi'j
ney jxi'nxak Santa Martha, Barranquilla
txi' Cartejena sxhabsu u'nikçe.







Sena nxus nxus u'junikče
Tuunxivxu u'ywe'sx seena
petxunüs pa'ka, txaji txää yuwe
ku'leya dxi'j sena pakwekuk.
Mtep mtep pkhaakhen u'juy
uywe'sxpwe'sx putxwe'wnikče
txijx vxu i pakweçx.






Nasawe'sx wëese'jçx peena uywe'sx
nxak Yaatxnxis Umn mhiikuk naatenxu
kna'swe'sx sena pi'txita. Txääanxu'
na'jik "Maa kiwesu taadxin u'jukna,
aça kwe'sxsa üukhnüsthaw txää
pa'ka we'wme üsthaw. U'ka na'
süjuth uywe'sx pkhaakheçx myahtxwe
kwe'sxtx sena petxun üsta".







U'ywe'sxnak masume mhiin u'ju
pa'ka, kwekwe neehwe'sxkuk
yaaskwe txikhnikçe. Yaasenxi eente
nasawe'sxn xu txijx yaaskwe wëse'jçx
thuthkuk kuse kiiskuk aça knaynikçe
neehwe'sx yuya' Kwetyu' kiwete.





Neehwe'sxyute nasawe'sxnxak
eena eena mhiikuk. Kiwe
Thëgnasnxak piçtatxwe'sx
ewme nxa üsnxi nxu'txpe'jn,
txäwëyçxää u'ywe'sxnxak nxa
üusya, jxtey nxunxa pu'çxnikçe.





Nunxisanik napa açekutx yuus
we'wsa pa'ka, nasa fxi'znxis nwe'wä
äatekuk we'wek txäwëyçxää ewkwe
fxi'zeya dxi'j pakwen sena pu'çxikuk.
Vxitesa açe we'wkutx ewme jxuth
psuwën. Teedxi'j najinitx "txää fxtüu
mwäta'j" i'ka jiyumenik.







Nasawe'sx neewe'nxis çxhäçxha üustxi'pçx
ewme jxuth yuwe yahtxçx yujunikçe,
txäwëyçxää upa çaan tu'snas, txi'
piçthë'w'esx nu'txpejn. Kiwe thegnas i'khçx,
açe' we'wnxi sena nxus nxusn kujunikçe,
nasakwe jxawn üste, txijx yuwe txi' txijx
mhi' äatekuk nenxu' "we'wçxa ikhe'kutx.
We'wmete pa ikhe'kutx. txaja we'we
ji'phudkhaw".







Kwekwe neehwe'sx kiwe nwe'wn u'ju
pa'ka ikh wëjekutx. Ta'da a'tete teeçx
kuspxähn kwekwe neehwe'sx yatsu
taadxikuk. Dxi'j walate kuspxähsu
Kiwe Thegnas ühpatx skhewkuktxçe.

Tximnxuh yeeçxmenikyu'. Txää
nxu' nasawe'sx ew nwewu'kuk, txix
üuskwe yahtxçxme'.







Ta'da a'tete e'ba kheb eente Cristina
Kiwe Thëgnas nxak üpa çaan tu'snas
neewu'n u'junikçe, yahtxmey ikhnikçe,
Asdrual Cayapu, Eliodoro Finscue,
José Gerardo Soto, txi' James Wilfredo
nxak. Txäawe'sx yaatxnxi bakaçxpa
ïtxi u'juze kwe'sx Kiwete.





Puyjinas makwe wëtme u'juçx napa kite nawëy zxiçxkwe sxihkan u'jukçe.

“Jxukanas Kiwe Thëgnasthaw kwe’sx Kiwe new’wn”
“Nasa peeskupxtey u'ywe'sx fxi'znxisnxu ewkyu, äçxiya jxtey yuya çxää pejxa”

Cristina Bautista Taquinas (12 de noviembre de 1989 buçxan kähnik – Aça 29 de octubre de 2019 skhewn fxi'zk)



"we'wçxa ikhe'kutx. We'wmete pa ikhe'kutx. txaja we'we ji'phudkhaw"